

Newspaper

Berita Harian

Date

5 March 2016

Pertemuan PM, Raja Salman bukti iktiraf hubungan baik

» Keakraban beri banyak manfaat kepada rakyat, peniaga Malaysia



Fazli Abdullah
fazliabddullah@bh.com.my

Riyadh ▶

Pertemuan Datuk Seri Najib Razak dengan Raja Salman Abdulaziz Al Saud di kediaman Raja Arab Saudi itu pada Rabu lalu, cukup bermakna kepada hubungan dua hala kedua-dua negara.

Walaupun tiada sebarang memorandum persefahaman atau perjanjian dimeterai, pertemuan kali kedua Najib dengan Raja Salman itu amat signifikan.

Ia juga satu penghormatan besar kepada Perdana Menteri dan Malaysia apabila majlis itu turut dihadiri kerabat diraja, menteri, ketua kerajaan serta kepimpinan tertinggi tentera Arab Saudi. Menteri Pertahanan, Datuk Seri Hishammuddin Hussein dan Menteri di Jabatan Perdana Menteri, Datuk Seri Jamil Khir Baharom turut serta pada pertemuan yang berlangsung kira-kira 90 minit.

Secara simboliknya, sambutan hebat itu adalah jelas menunjukkan Arab Saudi memandangi tinggi kepada Malaysia.

BH-5/3/2016

Raja Salman mengiktiraf hubungan Arab Saudi dengan Malaysia kini berada pada tahap tertinggi, sekali gus membuktikan baginda amat berpuas hati dengan hubungan kedua-dua negara, selain kagum dengan pencapaian negara

Najib Razak, Perdana Menteri



Malah, Raja Salman mengiktiraf hubungan Arab Saudi dengan Malaysia kini berada pada tahap tertinggi, sekali gus membuktikan baginda amat berpuas hati dengan hubungan kedua-dua negara, selain kagum dengan pencapaian negara.

Hubungan tahap terbaik

"Ini melambangkan hubungan kedua-dua negara dalam keadaan terbaik," kata Najib kepada wartawan Malaysia yang mengikuti lawatan kerja empat hari beliau ke Arab Saudi.

Keakraban hubungan kedua-dua negara sudah tentu akan memberi banyak manfaat kepada rakyat serta masyarakat perniagaan Malaysia.

Antaranya dari segi urusan haji dan umrah. Dengan tempoh menunggu selama 72 tahun bagi pendaftaran baharu haji ketika ini, hubungan is-

timewa ini akan memberi ruang yang lebih kepada Malaysia untuk membolehkan lebih ramai rakyat menunaikan haji setiap tahun.

"Malaysia adalah antara negara yang mendapat pertimbangan yang sangat baik dalam hal ini," kata Perdana Menteri.

Komuniti perniagaan juga tidak ketinggalan akan mendapat manfaat apabila lebih banyak bidang baharu boleh diterokai di Arab Saudi berikutan hubungan istimewa kedua-dua negara itu.

Selain Prasarana Malaysia Berhad (PRASARANA) yang mendapat kontrak mengendalikan dan menyelenggara perkhidmatan Makkah Metro, kini Malaysia Airports Holdings Berhad (MAHB) menawarkan kepakaran mengendalikan Lapangan Terbang Antarabangsa Jeddah.

Kongsi pengalaman Malaysia

Malah, Najib yang berkongsi pengalaman Malaysia dalam membangunkan negara menerusi Perkongsian Awam Swasta (PPP) ketika menyampaikan ucapan di Forum Ekonomi Jeddah, menawarkan kepakaran negara kepada Arab Saudi dan juga masyarakat perniagaan di negara itu.

Dengan cara ini, ia boleh meningkatkan penyertaan Malaysia di Arab Saudi dalam bidang tertentu seperti penjaan tenaga, perumahan dan penjagaan kesihatan, sekali gus menyumbang kepada pertumbuhan ekonomi negara.

Dalam keadaan ekonomi yang semakin mencabar, sektor swasta Malaysia sewajarnya memanfaatkan hubungan baik kedua-dua pemimpin negara untuk meneroka peluang baharu di Arab Saudi.